

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

- अनंतनाग-राजौरी पार्लिमानी हल्के च रिकार्ड 53 फीसद मतदान दर्ज कीता गेआ ऐ। जम्मू कश्मीर च 5 पार्लिमानी हल्के च 58.11 फीसद मतदान होआ जेहड़ा पिछले 35एं ब'रें च सब्बने शा मता ऐ।
- अनंतनाग-राजौरी पार्लिमानी हल्के लेई कायम विशेष मतदान केन्द्रें पर 47 फीसद मतदान दर्ज कीता गेआ।
- उपराज्यपाल मनोज सिन्हा होरें अनंतनाग-राजौरी पार्लिमानी हल्के लेई होए दे ऐतिहासक मतदान लेई सब्बने सरबंधी धड़ें गी मुबारकबाद दिक्ती।
- मुख् चुनां आयुक्त राजीव कुमार होरें आखेआ जे जम्मू कश्मीर च विधानसभा चुनां तौले गै करोआए जांगन।
- जम्मू बिजली विकास कारपोरेशन लिमिटेड दे एमडी होरें आखेआ जे जम्मू दे लोकें गी गर्मी थमां राहत पजाने च बाद्दू 200 मैगावाट बिजली मददगार साबत होग।

<><><><><><>

## J&K Election

लोकतांत्रिक जोश दे इक ऐतिहासक प्रदर्शन च 18मीं लोकसभा ताई देस भरै च कल होए दे 6में गेड़ दे चुनाएं दे हिस्से च अनंतनाग-राजौरी पार्लिमानी सीट दे वोटरें बी बड़ी बद्ध गिनतरी च अमन-रमानदारी कन्नै मतदान कीता। इत्थें तकरीबन 53 फीसद मतदान दर्ज कीता गेआ। मुख् चुनां अधिकारी पी.के.पोले होरें जानकारी सांझा करदे होई आखेआ जे जम्मू कश्मीर च 5 संसदीय सीटें पर अभूतपूर्व 58.11 फीसद मतदान दर्ज कीता गेआ ऐ जेहड़ा पिछले 35एं ब'रें च सब्बने शा मता ऐ। श्री पोले होरें आखेआ जे एह लोकें दी चुनां च हिस्सेदारी अमन, रमानदारी ते नागरिक जुड़ाव आले नमें युग दा प्रतीक ऐ। उनें गलाया जे एह चुनां बिजन कुसै बाख्तिवार जां धमकी दे आयोजित करोआए गे जेहड़ी वोट च मतदाताएं दे पक्के बसाह भरोसे गी दस्सदा ऐ। मुख् चुनां अधिकारी होरें पिछले 4-5 ब'रें दरान बेहतर सुरक्षा ते कनून बवस्था आला माहौल 20 मेदवारें ते सियासी दलें दी लामबंदी स्वीप गतिविधिएं राएं चुनां सरबंधी जागरूकता ते सब्बने शा बद्ध वोटरें दा पक्का भरोसा ते मतपत्रें राएं गै अमन, तरक्की ते खुशहाली मुमकन होई सकदी ऐ, कामयाब चुनाएं दे मुंडले कारण दस्से।

<><><><><><>

## Migrants

लोकसभा चुनावें दे 6में गेड़ तैहत्त कल मुल्ख भरै दे 58 पार्लिमानी हल्के च वोट पाए गे। इस्सै तैहत्त जम्मू कश्मीर दी अनंतनाग-राजौरी लोकसभा सीट पर बी मतदान होआ। कल होए दे मतदान च 47 फीसद कश्मीरी विस्थापतें बी वोट पाने दे अपने अधिकार दा इस्तेमाल कीता। अधिकारिक रिपोर्ट मूजब जम्मू च कायम 29 विशेष मतदान केन्द्रें पर 39.3 फीसद मतदान होआ। दिल्ली दे विशेष मतदान केन्द्रें पर 53 फीसद ते उधमपुर च कायम विशेष मतदान केन्द्र च 49.90 फीसद मतदान होआ। एह फीसद पिछले त्रै गेड़े च इत्थें होए दे मतदान च सब्बने थमां मती ऐ। श्रीनगर पार्लिमानी सीट लेई 38 फीसद ते बारामुला-कुपवाड़ा लोकसभा सीट लेई 32 फीसद मतदान दर्ज कीता गेआ हा।

<><><><><><>

## LG-Message

जम्मू कश्मीर दे उपराज्यपाल मनोज सिन्हा होरें अनंतनाग-राजौरी संसदीय सीट पर एतिहासक मतदान तांई लोकें ते अधिकारिण कन्ने जुड़े दे कर्मचारिण गी बधाई दित्ती ऐ। उनें चुनावें दरान केन्द्र शासत प्रदेश दिणें सब्बने 5 लोकसभा सीटें पर सुरक्षा बवस्था लेई जम्मू कश्मीर पुलस ते सुरक्षा बलें दी सराहना कीती। मुख्ख सचिव अटल डुल्लू होरें गी बिजन थके दे मेहनत करने ते चुनावें गी अमन-रमानदारी कन्ने सुचारू ढंगै सिर करोआने लेई सिविल प्रशासन ते पुलस दौनें दी सराहना कीती। श्री डुल्लू होरें आखेआ जे इस गल्ला गी जकीनी बनाने दे पुख्ता बंदोबस्त कीते गेदे हे जे आम जनता गी वोट पाने च मुश्कलें दा सामना नेई करना पवै ते मीडिया नै बी मतदाताएं दे जोश गी बरोबर दस्सेआ जेहदे कन्ने जम्मू कश्मीर च चुनावें इक पर्व आला लेखा लग्गेआ।

<><><><><><>

## DGP Scholarship

पुलस कर्मिण जिंदे च एसपीओ बी शामिल न दे बच्चें गी प्रेरित करने, उंदे च सकारात्मक मकाबलेबाजी आली भावना पैदा करने लेई पुलस महानिदेशक आर.आर.स्वैन होरें शहीदें, पुलस कर्मिण दे बच्चें गी माली मदाद देने दे अलावा 8 लक्ख 50 ज्हार रपे दे वजीफे मंजूर कीते न। एह वजीफे नेह 105 बच्चें गी दित्ते जांगन जिंदे बक्ख-बक्ख मतेयाने च बेहतर ते टकोहदी कारकरदगी दस्सी ऐ। 10मीं जमात च 90 फीसद थमां बद्ध नंबर लैने आले बच्चे गी 6 ज्हार रपे ते 80 फीसद नंबर लैले आले गी 4 ज्हार रपे दित्ते जांगन। इस्सै चाल्ली 12मीं जमात च 90 फीसद थमां बद्ध नंबर लैने आले बच्चे गी 72 सौ रपे ते 80 फीसद नंबर लैने आले गी 6 ज्हार

रपे दित्ते जांगन। जेईई मेन, नीट, बीओपीईई ते जीएटीई दे मतेयान पास करने आले गी 10-10 जहार रपे दित्ते जांगन।

<><><><><><>

## DC Kathua

कठुआ दे डिप्टी कमीशनर डॉ. राकेश मिन्हास होरें सिविल ते पुलस मैहकमे दे वरिष्ठ अफसरें कन्नै बसोहली सब-डिवीजन दे ग्रां डांबरा च बना'रदी बड़ा मती सुरक्षा आली जेल दी निर्माण आली थाहरे दा कल दौरा लाया। डॉ. मिन्हास होरें जेल दे बक्ख-बक्ख हिस्सें च चला'रदे निर्माण कम्में दा मौके पर जायजा लैता। उनें कम्म करोआ करदी अर्जेसिएं गी एह जकीनी बनाने दे निर्देश दित्ते जे कम्म इस ब'रे दे खीरै तगर मुकम्मल होई जाना लोड़चदा। डीसी होरें कम्में च मय्यार गी बनाए रखने ते होरने दिशा निर्देशों दी सख्ती कन्नै पालमा करने दे महत्वै पर जोर पांदे होई मय्यार कन्नै कोई बी समझौता नेई करने लेई आखेआ।

<><><><><><>

## DC Reasi

रियासी दे डिप्टी कमीशनर विशेष महाजन होरें कल टकोहदा हुक्म जारी करदे होई अफसरें गी आखेआ जे ओह महिला सशक्तिकरण ताई इस ब'रे जिले च जन्म लैने आली हर बेटी दे जन्म दा उत्सव मनान। समाज कल्याण मैहकमे दे कम्मकाज दी समीक्षा करदे होई उनें बेटी बचाओ बेटी पढ़ाओ योजना पर टकोहदा जोर पाया। बैठक दरान लाभार्थिएं गी लाह पजाने दे मकसद कन्नै योजनाएं ते गतिविधिएं दी अमलावरी पर टकोहदा ध्यान दित्ता गेआ। श्री महाजन होरें स्कीमें दी सुचारू ढंगै सिर अमलावरी गी जकीनी बनाने लेई होर दपु मुत्तलका मैहकमें कन्नै रलियै कम्म करने दे महत्वै पर जोर पाया।

<><><><><><>

## Assembly Election J&K

लोकसभा चुनाएं दरान जम्मू कश्मीर च होए दे मतदान थमां उत्साहित चुनां आयोग तौले गै केन्द्र शासत प्रदेश च विधानसभा चुनां करोआने दी प्रक्रिया शुरू करोग। एह गल्ल मुख् चुनां आयुक्त राजीव कुमार होरें दिल्ली च इक खबर अर्जेसी कन्नै गल्लबात करदे होई आक्खी। जम्मू कश्मीर दिएं 5एं संसदीय सीटें पर होए दे मतदान ते कन्नै गै विधानसभा चुनां तौले गै मुमकन होई सकदे न, बारे पुच्छे गेदे सुआले दे परते च मुख् चुनां आयुक्त होरें आखेआ जे संसदीय चुनाएं च लोकें दी हिस्सेदारी कन्नै आयोग बड़ा प्रोत्साहित ऐ। उनें आखेआ जे जम्मू कश्मीर दे लोकें गी अपनी चुनी दी सरकार थ्होग ते एहदी प्रक्रिया तौले गै शुरू होग। एहदे शा पैहले मार्च म्हीने लोकसभा चुनां कार्यक्रम दा ऐलान करदे होई श्री कुमार होरें आखेआ हा जे विधानसभा ते

लोकसभा चुनाव कन्नो-कन्नी करोआना साबो समेयान ते सुरक्षा कारणें करियै व्यावहारिक नेई हा। जम्मू कश्मीर च जिसलै बी विधानसभा चुनाव होंगन ओ अगस्त 2019 च दफा 370 गी हटाने ते जम्मू कश्मीर गी दऊं केन्द्र शासत प्रदेशें च तक्सीम करने मगरा पैहली बारी होंगन। जम्मू कश्मीर च चुनावी प्रक्रिया तकरीबन आम तौरा पर तकरीबन इक म्हीना चलदी ऐ। हदबंदी परेंत पाकिस्तान दे नजैज कब्जे आले जम्मू कश्मीर गी आबंटित सीटें गी छोड़ियै विधानसभा सीटें दी गिनतरी 83 थमां बधियै 90 होइ गई ऐ। जंदे ब'रे दिसम्बर च सुप्रीम कोर्ट नै जम्मू कश्मीर च 30 सितम्बर तगर चुनावं करोआने दे निर्देश जारी कीते दे न।

<><><><><><>

## JPDCL

जम्मू बिजली विकास कारपोरेशन लिमिटेड दे एमडी विकास कुंडल होरें आखेआ जे महतवै आले फैसले तैहत जेपीडीसीएल नै बाद्धू 200 मैगावाट बिजली खरीदने दी प्रक्रिया पूरी करी लैती ऐ। एहदे कन्नै जम्मू दे लोकें गी गर्मी थमां किश राहत थहोग। उनें गलाया जे जम्मू खित्ते गी मजूदा समें च 12 सौ मैगावाट बिजली थहोंदी ऐ पर एलजी प्रशासन दे जतनें करी हुन 14 सौ मैगावाट बिजली हासल होग। उनें साफ तौर पर आखेआ जे जम्मू शैहरा दे उनें इलाकें जित्थें स्मार्ट मीटर लग्गे दे न, उत्थें बिजली दी कटौती नेई होग ते बाद्धू बिजलील थहोने कन्नै हुन ग्रामीण इलाकें च बी कटौती घट्ट होग। विकास कुंडल होरें जम्मू दे लोकें गी अपील कीती जे ओह किफायत कन्नै बिजली दा इस्तेमाल करन ते बिजली दी चोरी नेई करन तां जे सारे उपभोक्ताएं गी बिजली दी सुविधा थहोई सकै। उनें आखेआ जेपीडीसीएल बिजली चोरी करने आले खलाफ सख्त कारवाई करोग।

<><><><><><>

## TB CO

उधमपुर दियां डीसी सलोनी राय होरें टीबी दी बमारी कन्नै सरबंधत समन्वय कमेटी दी इक बैठक दी प्रधानता कीती। डीसी होरें मुत्तलका अफसरें गी निर्देश जारी करदे होई आखेआ जे ओ जिले च टीबी दे टैस्टें गी बधाने ते टैस्ट दिएं सहूलतें च बी सुधार करन। उनें टीबी मरीजें दी तौले पंछान ते ईलाज दी सहूलते दी लोड़ पर जोर भरेआ। एहदे अलावा उनें सरबंध अफसरें गी गैर तंबाकु कन्नै जुड़े दे टीबी आले मामलें दी टकोहदी पंछान करने दे निर्देश जारी कीते तां जे इंदे कारणें दा पता लाइयै बेहतर ईलाज कीता जाई सकै।

<><><><><><>

## Photo Exhibition

संस्कृति ते जनजातीय मामले सरबंधी प्रधान सचिव सुरेश कुमार गुप्ता होरें कल कला केन्द्र च मन्ने परमन्ने दे पत्रकार सन्नी दुआ हुंदी फोटू प्रदर्शनी दा उदघाटन कीता। एहदा सरिस्ता कला केन्द्र सोसाइटी जम्मू पास्सेआ जम्मू कश्मीर दी विरासत विशे-सार कन्नै कीता गेआ ऐ। इस प्रदर्शनी दी सराहना करदे होई सुरेश कुमार गुप्ता होरें आखेआ जे एहदे कन्नै जम्मू कश्मीर दी समृद्ध विरासत गी दिक्खने दा मौका थ्होंदा ऐ। उनें आखेआ जे एह थाहरां ते इमारतां असंगी अपनी जड़े कन्नै जोड़दियां न। उनें विरासती इमारतें गी परतियै नमें सिरेआ सुआरने जिसदे च मुबारकमंडी परिसर बी शामिल ऐ, लेई कीते जा'रदे कम्में बारे बी दस्सेआ।

<><><><><><>